



Publicaziuns officialas dils 28-09-2018

habitar@giuven

Affittaziun da habitaziuns ella casa da scola a Sumvitg

Il schaner 2018 ha la cumissiun habitar@giuven presentau l'idea per transformar l'alzada sisum dalla casa da scola da Sumvitg en habitaziuns. Sin fundament digl interess demussau ha la cumissiun observau vinavon l'idea ed elaborau in project.

La suprastanza communal ha previu da realisar il project cun resalva dall'approbaziun dalla radunonza communal e d'affittar las habitaziuns naven dil fenadur 2019.

Tut las personas che han interess da prender a tscheins ina dallas habitaziuns naven dil fenadur 2019 ein supplicadas da s'annunziar tier l'administraziun communal entochen ils 19 d'october 2018.

Per damondas stat il canzlist communal (tel. 081 920 25 00) bugen a disposiziun.

Sumvitg, 28-09-2018

Suprastanza communal

Rumians da casa

Deplorablamein havein nus constatau ch'ei vegn deponiu rumien divers en ils molocs senza risguardar las prescripziuns davart l'economisaziun dils rufids dalla Regiun Surselva. Nus fagein in'ulteriura gada attents che sulettamein ils sacs verds dalla Regiun Surselva ni sacs cun la marca corrispudenta astgan vegnir dismiss els molocs. La vischnaunca vegn egl avegnir a far rigurusas controllas. Surpassaments vegnan denunziati alla Regiun Surselva, la quala vegn a punir ils surpassaments.

Nus supplichein da setener vid las prescripziuns ed engraziein per Vossa capientscha.

Sumvitg, 28-09-2018

Suprastanza communal

Serrada via d'uual Crap Ner

Muort lavurs vid in tagl da lenna ei la via d'uual Crap Ner serrada denter Salvaplauna e Crest ault per tut il traffic naven da gievgia, ils **4 d'october entochen venderdis, ils 12 d'october 2018**. La via resta serrada sur notg e duront la fin d'jamna. A pei e cun velo eis ei pusseivel da passar atras. Nus engraziein per Vossa capientscha.

Tier damondas stat il selvicultur da revier bugen a disposiziun (081 920 25 06 ni 079 681 19 67).

Sumvitg, 28-09-2018

Uffeci forestal Sumvitg

Curdem da gronda dimensiun

La vischnaunca organischescha ina rimnada da rufid bloccont sco suonda:

Venderdis, ils 19 d'october 2018 dallas 08.00 - 18.00 uras

Ei vegn rimnau il rufid per l'entira vischnaunca sin la piazza Igniu (spel baghetg economic)

Ils curdems ein da deponer els containers ni navettas tschentai sil plaz. Per tener-casa vegn priu encunter **max. 2 m³** rumians. Quantitads pli grondas, per ex. ord rumidas da casas e clavaus ein da transportar directamein e sin cuost dil caschunader ella deponia regionala a Rueun. Rumians jamnils, q.v.d. rumians ch'ins dismetta el sac verd e rufid bloccont pign (dimensiuns max. 100 cm liung / 60 cm lad / 60 cm ault / peisa max. 30 kg) vegnan buca pri encunter. Tals rumians ein da plazzar als plazz da rimnada usitai els vitgs e che vegnan rimnai entras la Regiun Surselva mintgamai la mesjamna.

Ei vegn acceptau

- maschinas pintgas e mopeds mo cun tratg giu ieli e benzin,
- ferramenta, ferradira da tuttas sorts (meisas da fier, uaffens da fier, velos, e.a.v.),
- tut las maschinas electronicas (computers, frestgeras, maschinas da furar, pegnas d'electricch cun e senza ieli e.a.v.),
- mobiliar movibel (letg, scaffa, suppia, madrazza, teppi denton buca culau giu, e.a.v.),
- requisits per il temps liber e sport (skis, indrez da trenament, velos e.a.v.) ch'ei pli gronds che 100 cm liung / 60 cm lad / 60 cm ault ni pli grevs che 30 kg,
- per pneus senza gavegl vegn incassau ina taxa da frs. 5.--, cun gavegl frs. 10.--,
- per pneus da maschinas agricolas pintgas vegn incassau ina taxa da frs. 20.-- e per pneus da tracturs frs. 50.--,
- calzars da skis san vegnir dai giu en favur dalla ARGO Tavau per frs. 5.--.

Buca acceptau vegnan

- tuttas maschinas agricolas,
- lenna da brisch, lenna veglia, lenna da baghetg (tabliaus, plantschius, lattas, quaders, panos, e.a.v.),
- sacs da pupi e da plastic,
- materials da pachetar (palets, stiropor, plastic, e.a.v.),
- requisits per il temps liber e sport ch'ei pli pigns che 100 cm liung / 60 cm lad / 60 cm ault e pli levs che 30 kg (bob, scarsola, calzars da rodas, aissa-rulletta e.a.v.),
- blachas da ballas da silo (verdas ed alvas),
- curdems da baghetg (linoleums, isolaziuns, plastics, folias da tetg e da preits, e.a.v.) e curdems da fatschentas,
- curdem verd da curtin e caglias, tals curdems san vegnir transportai sin la deponia verda ad Igniu,
- cartun e pupi duei vegnir surdau alla rimnada entras la scolars resp. las uniuns.

Ils suandonts rumians vegnan rimnai cun ils rumians jamnils e basegnan las marcas sco suonda:

- sacs tochen 50 kg; 1 marca da frs. 2.50,
- rumians pigns tochen 100 cm liung / 60 cm lad / 60 cm ault e pli levs che 12 kg; 2 marcas da frs. 2.50,
- rumians pigns tochen 100 cm liung / 60 cm lad / 60 cm ault entochen ina peisa da 30 kg; 3 marcas da frs. 2.50.

Nus appelein alla responsablada da vischinas e vischins e supplichein da setener vid quellas directivas en favur digl ambient. Medemamein fagein nus attents da buca deponer rumians sin deponias illegalas (selvadias). Talas deponias cunterfan alla legislaziun per la dismessa da rumians e vegnan annunziadas als organs responsabels e puni.

Per ulteriuras informaziuns stat il gerau responsabel bugen a Vossa disposiziun.

Sumvitg, 28-09-2018

Departament d'ambient

Café Zeitlos a Mustér

Café Zeitlos – in liug da sentupada per personas cun ina demenza, per tierparents ed interessai. In liug per passentar in suentermiezdi emperneivel, per s'informar e s'incuntrar. Ei drova negina annunzia. Il Café Zeitlos ei gratuits ed aviarts per tuts. La consumaziun surpren la PUNTREIS Center da sanadad.

Datums per 2018:

venderdis, 5 d'october

venderdis, 2 da november

venderdis, 14 da december

Dallas 14.00–16.00 en PUNTREIS Center da sanadad, Via Cons 11, 7180 Mustér.

Nus selegrein da Vossa viseta!

Uniun samaritana Sumvitg-Trun

Nies proxim exercezi tecnic ha liug gliendisdis, igl 1. d'october 2018 allas 20.00 en nossa stanza a Sumvitg. Tema: accidents

Astgar beneventar ulteriuras personas cun interess vid la lavur samaritana fagess grond plascher!

Cordials salids ed a bien seveser

La suprastonza